



Nuuk, 19. septemeri 2016

UKA 2016/75

Inatsisartut suleriaasiat § 36 immikkoortoq 1 naapertorlugu matumuuna apeqquteqaat aallaavigalugu oqallisissiatut siunnersuut imaattoq saqqummiuppara:

Immikkut ittumik suliniutit meeqqanik inuusuttuaqqanillu sumiginnaasarnerup annikillissarnissaanut pingaartumillu angajoqqaatut akisussaaffimmik erseqqissaanissamut tunngasut ingerlanneqarsinnaanerit pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Anthon Frederiksen, Partii Naleraq).

Tunngavilersuut:

Meerartavut nunatta siunissami atorfissaqartittorujussuuai, tamaattumik inersimasut tamarluinnatta soqutigisariaqarparput, meeqqat sapinngisamik pitsaanerpaamik perorsarlugillu ajuunnginnerpaanik atugassaqartinneqarnissaat isumagissallugu.

Soorunami nalunngilarput meeqqanut akisussaasut oqartussaasullu pingaarnerpaat tassaasut angajoqqaat.

Taamaakkaluortoq nassuerutigisariaqarpoq, angajoqqaarpassuaqarmat meeqqaminnik pisussaaffik eqqorlugu suliniuteqarpiannngitsunik. Tamannalu arlalitsigut takussutissaqarpoq inuiqatigiinnut ilaatigut aningaasarparujussuarnik naleqartartunik.

Soorunami suliniarnitsinni aningaasaannaat eqqarsaatigisinnaanngikkivut nalunngilarput, kisianni taamaakkaluortoq maannamut ilisimalersimasatta ilagaat, meeqqat angerlarsimaffiup avataanut inissinneqarsimasut september 2014 tikillugu 642-inik amerlassuseqartut, aammalu taamatut inissiisarneq inuiaqatigiinnut minnerpaamik 235 million kr-init missaani ukiut tamaasa aningaasartuuteqarfigineqartartoq.

Taakkua saniatigut meeqqanut inuusuttuaqqanullu suliniutit arlalissut ukiuni arlalinni qujanartumik ingerlanneqartuarput.

Taamaakkaluortoq meeqqat inuusuttuaqqallu ikiorneqarnissamik siunnersorneqarnissamillu pisariaqartitsisut ilaatigut MIO-p 2015 nalunaarusiaani takuneqarsinnaapput.

Meeqqat inuusuttuaqqallu SMS-ikut telefon-ikkullu ajornartorsiutit assigiinngitsut pillugit ikioqullutik saaffiginnittartut amerliartortut oqaatiginiarneqarpoq, aammalu Inatsisartut 2016-imi upernaakkut oqallinnitta ilaanni Isumaginninnermut Naalakkersuisup ernumanartutut oqaatigaa meeqqat inuusuttuaqqallu angallarsimaffiup avataanut inissinneqartartut amerleriarsinnaanerat.

Pissutsit taama isikkoqarnerat inuiaqatigiinni, minnerunngitsumillu meeqqanut toqqissisimananngilaq.

Taamaattumik Inatsisartut ataqqinartusi, Partii Naleqqami isumaqarpugut meeqqanut inuusuttuaqqanullu pitsaanerpaassaq anguniarlugu apeqqutit makku minnerpaamik sukumiisumik oqaluuserisariaqarivut:

1. Meeqqat ilaasa unnuarsuarmut nakkutigineqaratik aneertarnerat qanoq sukkullu iliuuseqarfigalugu massakkumit annikinnerusunngortinniarsinnaavarput?
2. Aalajangersaasariaqalinnginnerluta, Island assigalugu meeqqat assersuutigalugu 15-it inorlugit ukiullit nalunaaqutaq unnukkut aqqanernut tamarnik angerlarsimareersimasassasut?

Meeranguit ilaasa unnuarsuarmut nakkutigineqaratik aneertartut aserorterinernut tillinniarnernut allatulluunniit inuunerlunnermut nakkaateqqajaannginnissaat anguniarlugu qanoq sukkullu iliuuseqarfiginissaat eqqartortariaqarparput.

Apeqqutit ilagaat, qanoq iliornikkut angajoqqaat amerlanerpaat meeqqaminnik isumassuinerat nakkutiginninnerat, perorsaanerallu pitsaanerpaat anguneqarsinnaava?

Oqallilluarnissarsi qilanaaraarput.